

եանը անջատ քաղաքականութիւն է վարում անդլիական միսիայի հետ, Կ. Կոմիտէն, Ս. Ե-ի եւ Ս. Մ-ի միջոցով զգուշացնում է նրան, որ վերջ տայ իր բանակցութիւններին:

Այդ յայտարարութիւնը ազդում է Գերասիմ աղայի վրայ, որ դադարեցնում է իր բանակցութիւնները անդլիական միսիայի հետ:

Այդ միտիան մի առժամանակ մնում է Շուշի:

Բազուից միսիայի հետ եկել էին Չանգեզուրի Ազգային Խորհրդի անդամները եւ իրենց հետ մէկ միլիոն ուրբի դրամ էին բերել:

Այդ դրամը նրանք Բազուի ազգային մարմինների միջոցով, Չորավար Բազրատունուցն էին ստացել, Չանգեզուրի Ազգային Խորհրդի կարիքների համար:

Շուշում ընկերները այդ գումարից հարբեր հազար ուրբի են յատկացնում Ղարաղըլաղի գաղթականութեանը եւ դրամի բաշխումը յանձնում են Հայրապետ Մուսայէլեանին. իսկ իրենք ճանապարհուում են Գորիս:

Հայրապետ Մուսայէլեանը, Ղուկասեան զպրոցի չէնքում այդ դրամի մի մասը բաժանում է գաղթականներին անձամբ, իսկ միւս մասի բաշխումը յանձնում է զպրոցի ուսուցիչ Կարապետ Նարինեանին:

Այդ օրերին Ղարաղըլաղի գաղթականութեան մէջ ուժեղ տիֆ կար եւ օրական մի քանի հոգի մահանում էին:

Իրամը բաժանելու ժամանակ, երկուսն էլ վարակում են եւ շանցած ութ օր մահանում են:

Կորուստը շատ մեծ էր: Հայրապետ Մուսայէլեանը անդլիացու պէս շատ խորը կը մըտածէր եւ շատ ստուր կը դատէր: Երբեք իր առած առաջարկների մէջ չէր սխալուել եւ զիչեր ու ցերեկ, առանց յոգնելու ու դադարի կ'աշխատէր: Նա թէ Ղուկասեան զպրոցի տեսուչն էր, թէ Ղարաբաղի բոլոր մարմինների — յեղափոխութիւնից յետոյ — նախադահն էր, թէ՛ Հ. Յ. Գ. Ապառաժի Կ. Կոմիտէի նախադահն էր եւ թէ՛ մի շարք հասարակական մարմինների անդամ էր:

Հայրապետի կատարած գործը, կուսակցական կեանքը մի անգամից չի կարելի պատկերացնել: Պարտք է մնում նրա մօտիկ եւ

կեանքին մանրամասնօրէն ծանօթ ընկերների վրայ, լրիւ կենսագրականը տալու: Իսկ Ղարաբաղի հայ ժողովուրդը ու մանաւանդ Դաշնակցական ընկերները մի անելիք ունին՝ Հայրապետի յիշատակը վառ սրահել իրենց սրտերում:

Երկրորդ զոհը Կարապետ Նարինեանն էր, որ նոյնպէս Դաշնակցութեան մէջ եւ Ղարաբաղում որոշ աշխատանքներ ունի կատարած:

Այս երկու ընկերների կորուստը չափից դուրս զգալի էր Շուշուայ ընկերների համար:

Ղարաբաղի ժամանակաւոր Խորհուրդը կոչեցեալ մարմինը մի անհամաձայնութեան օրդան էր, որ չէր կարողանում իր գլուխը հաւաքել:

Սովորատ բէկը աշխատում էր ինքը լինել ընդհանուր հրամանատար. իսկ միւս հրամանատարները, որոնք աւելի փորձուած էին, չէին ցանկանում Սովորատ բէկին:

Այդ անհամաձայնութիւններին վերջ տալու համար, Ապառաժի Կ. Կոմիտէն որոշում է ժամանակաւոր Խորհրդի միջոցով համազումար հրաւիրել, որպէսզի նախ՝ մի հեղինակաւոր մարմին ընտրուի եւ երկրորդ՝ անդլիական միսիայի ներկայութեամբ, բովանդակ Ղարաբաղի հայ ժողովուրդի կամքը եւ ցանկութիւնը հանդէս բերուի իր քաղաքական դատի պաշտպանութեան համար:

Այդ նպատակով էլ, 1919 թ. Փետրուար 10-ին Շուշում Կ-րդ համագումարն է հրաւիրւում, որտեղ եւ ընտրւում է Ազգային Խորհուրդ՝ նախ՝ Ասլան Շահնազարեանի եւ յետոյ Եղիշէ Իշխանեանի նախագահութեամբ:

Այդ համագումարին Ազրբէյջանի կառավարութիւնը, Շուշուայ անդլիական միսիայի միջոցով առաջարկում է ներկայացուցիչներ ուղարկել Բազու՝ Ազրբէյջանի Պարլամենտին մասնակցելու համար:

Կ-րդ համագումարի ամբողջ պատկերը դժուարանում եմ տալու, որովհետեւ փաստաթղթեր չունիմ ձեռքիս տակ: Միայն այսքանը ասեմ, որ չորրորդ համագումարը որոշում է Ղարաբաղը համարել Հայաստանի անբաժան մասը, ոչ մի կերպ չընդունիլ Ազրբէյջանի իշխանութիւնը, եւ ոչ էլ ներկայացուցիչներ ուղարկել նրա պարլամենտին: